

7

ADRIANI  
PVLVAEI, LE-  
GVM DOCTORIS,  
ET IN SVPREMA  
CVRIA ADVO-  
CATI,

De aduocatorum priuilegiis fori  
ORATIO,



*Ad amplissimum ordinem.*



LVGDVNI,  
APVD GVLIELMVM ROVILLIVM,  
SVB SCVTO VENETO,  
M. D. LX.



## ILLVSTRISSIMO

principi Carolo Lotharingo

Cardinali, Adrianus Pul-

uæus S. P. D.



Extus Pomponius iurecon-  
sultus refert, illustrissime  
princeps, Seruiū Sulpitium  
à Q. Mutio obiurgatum,  
quòd ius in quò versaretur  
ignoraret: sed non minori reprehensione digni  
videri debent, qui eius professionis, in qua ver-  
santur, initia, progressus, ac utilitatē nō norūt.  
Quam in reprehensionem ne ego incurrerem,  
aduocationis togatorū (cui nomen in suprema  
curia aliquot abhinc annis dedi) originem, pro-  
gressus, utilitatē, dignitatemq; in cōmētarios,  
quāta fieri potuit à me diligētia, retulisse mihi  
videor, vnde hæc à me pro eminentissimæ ac il-  
lustrissimæ curiæ aduocatorū priuilegijs fori  
selecta transcriptaque sunt. Quæ cū multis  
magna virtute viris, inter eos verò M. Hospi-  
tatio, viro, vt tute scis, publici iuris morisq; ma-

iorum peritissimo, ὃς καὶ τοιοῦτος ἀκρίβειας, εἰ τις  
 ἄλλος, ἀξιότατος, se probari placereque intel-  
 ligerēt, te in hoc quidē regno cōsilio linguāque  
 principē, ex hoc theatro in Flandriam, vbi ab  
 Hispaniarū rege de pace iusiurandum exigis,  
 consequi nō dubitarut, quæ tum tibi de tam ho-  
 norifica plausibilique legatione cōgratularen-  
 tur, tum se in tuam fidē & clientelā cōferrent,  
 vt si abs te quoq; eo vultu, quo solēt ea, quæ à li-  
 teris nostrōque ordine proficiscūtur, se recipi  
 probarique deprehenderint, tum verē gloriari  
 possint, se patronis in suprema curia, amplissi-  
 mū in regia patrociniū, firmissimūq; propu-  
 gnaculū inuenisse: forēq; vt ἐκ τῆς ἐκείνου ὑπο-  
 μνημάτων συντάγματος tuis auspicijs aliquādo  
 in lucē manūsque hominū exeant. Fælicissimū  
 igitur tibi reditū precātur, idq; interim summi  
 loco beneficij abs te petūt, vt. tui iudicij bene-  
 uolentiāq; significatione & his in publicū ali-  
 quando prodeūdi, & illis in eo, id est, in suo di-  
 gnitatis, priuilegiorū, honorisq; gradu cōsistē-  
 di liberā certamq; spē ostēdere, suōq; authori-  
 de tā honorifica admissione congratulari pos-  
 sint. Vale. Lutetiae Parisiorū, Non. Maij, 1559.



ADRIANI PVLVAEI

*ll.doctoris, & in suprema curia  
aduocati, de aduocatorum  
priuilegijs fori, Oratio  
ad amplissimum  
ordinem.*



Mne ius P.C. vel in æqui  
& boni ratione consistit,  
vel in vtilitate versatur. Il-  
lud nullo vel loco, vel tem-  
pore, nullis vel iudicum sententiis, vel  
principum decretis, vel populorum  
iussis mutari violarique sine summo  
scelere & iniustitia potest. Est enim  
natura ipsa omnium hominum ani-  
mis insitum atque innatum, omnisq;  
mutabilitatis expers. Hoc quoniam  
non tam natura ipsa, quàm hominū

*Ratio a  
qui & bo-  
ni.*

*Ratio vti-  
litatis.*

iudicio, prudentia, usu, & doctrina  
 constituitur, nec interest iure naturæ  
 sic aut secus fiat, pro magistratuum  
 arbitrio, utilitate suadente, sine cu-  
 iusquam iniuria moveri variarique  
 potest. Est enim mensuris, authore  
 Aristotele, quæ non quocunque in lo-  
 co sunt æquales, simillimum. In hoc  
 autem iure vel constituendo, vel mu-  
 tando, ea virtute, consilio & sapietia  
 maiores nostri fuere, ut nec sceleratis  
 & facinorosis hominibus quiduis im-  
 punè liceret, nec bene de Rep. meri-  
 tis denegaretur honos. Existimaue-  
 runt enim illi sapientissimi homines  
 ex Solonis sententia hæc duo cuius-  
 que Reip. conservandæ esse debere  
 firmissima principia, & tanquam ar-  
 ctissima vincula præmium & pœnā:  
 quæ duo sine magno publici status  
 detrimento & perturbatione negligi  
 non possent. Itaq; cùm constans co-  
 rum

*Ius mensu-  
 ris simili-  
 mum.*

*Duo Rei-  
 pub. conser-  
 vandæ prin-  
 cipia.*

rum & perpetua esset voluntas suum  
 cuique tribuendi, & ut rectè quidem  
 factis præmia, peccatis verò suppli-  
 cia extarent, id tum deinde religiosè  
 curarūt, ut dea illa virgo, quam The-  
 mim, vel Dicen vocāt, augusto quo-  
 dam in loco collocaretur ac iudiciis  
 præesset: augustiore verò non potuit  
 quàm in hoc admirabili & sacrosan-  
 cto Parisiensi theatro, quod non ho-  
 minum, sed heroum conuentum esse  
 Lineas ille Pyrrhi Epirotarum regis  
 orator, meritò diceret: in quo tot Vi-  
 piani, tot Scæuolæ, tot Papiniani, tā-  
 ta cum iuris & iustitiæ æquabilitate  
 pari cum maiestate coniuncta præ-  
 sunt, ut (quod aliquando cōsecutum  
 M. Brutum tradunt) in plurimorum  
 controuersis diiudicandis ab omni-  
 bus diligantur, & eos ipsos quos con-  
 tra statuunt æquos placatosque di-  
 mittant. Cuius integritatis, vsus, &

*Dice dea  
iudicij pra  
est.*

*Lineas  
Pyrrhi ora  
tor.*

doctrinę ergò non hic tantummodò  
 confessus vester, iudices, multis ma-  
 gnisque honoribus ac priuilegiis (ta-  
 met si ea quanlibet magna vestris in  
 Remp. meritis vix vnquam respon-  
 dere possint) cumulatur & ornatur,  
 sed etiam ciuitas ipsa iis aucta & de-  
 corata,

-- *Tantum alias inter caput extulit vrbes,  
 Quantum, lenta solent inter viburna cupressi.*  
 Verùm enim uerò nescio quo fato,  
 speciosi quidam homines nuper in-  
 uenti sunt (quos quæso oroque, vt si  
 quid fortè erit acerbum auditu, sine  
 offensione accipiant quod dixero,  
 néve id, priusquam quale sit explica-  
 uero, in deteriore partem vertant:  
 non enim exprobrandi aut lædendi  
 causa, sed commonendi gratia, pró-  
 que mea perpetua cupiditate vestræ  
 dignitatis tuendæ retinendæq; dicā)  
 qui publicæ vtilitatis simulatione, dis-  
 simu



simulato odio, iracūdia, ambitione,  
 vel insatiabili auaritia quadrata ro-  
 rundis mutare (vt aiunt) déque tanti  
 Senatus authoritate & dignitate de-  
 trahere ex vsu suo esse arbitrantur.  
 Quod cū palam & aperto Marte se  
 perficere posse diffiderēt, occultè cu-  
 niculis rem aggressi sunt, paruum il-  
 lum & imbecillum Sertorij militem  
 imitati, qui cū equinæ caudæ setas  
 omnes vno impetu vellere nō posset,  
 paulatim vellendo eam exigui tem-  
 poris spatio nudauit. Iis artibus & do-  
 lis astuti illi homines (vt maiores sci-  
 licet quæstus facerent, tum ex tribu-  
 nalibus, quibus præesse dicuntur, tū  
 ex actis publicis, quæ magno vel cō-  
 duxisse, vel comparasse vulgò ferun-  
 tur) rem ante hoc tempus multū a-  
 gitatam, diu tractatam, & cui Sena-  
 tus ipse frequens restitit, hodierno  
 die in disquisitionem reuocarunt, &

*Imbecilli  
 Sertorij mi-  
 litis facti.*

ita per obreptionem apud priuatum concilium egerunt, ne amplius huius summæ curiæ causarum patroni fori priuilegiis fruerentur, sed coram ordinariis, & pedaneis iudicibus lites, si quas ipsi cum aliquibus haberent, persequerentur: eamque in rem edictum, de quo nunc à vobis vel comprobando vel improbando agitur, contra exempla atque instituta maiorum componendum describendūque, & ad vos, vt sententiis vestris confirmaretur, mittendum curarunt (si id edictum nominandum est, ac non versuta & fallax nocendi ratio, quod insidiosè confictum est, & à cupiditate & inimicitiis profectū) quo quidem edicto non nostra solummodò cōmoda minui & impediri, sed etiā dignitatem vestram publicamq; utilitatem magnopere lædi, si per vestrā benignitatem & attentionem lice-

rit,

*Edictū de  
fori priuile-  
gijs summæ  
curiæ cau-  
sarum pa-  
tronorum.*

rit, me facillè demonstraturū esse con-  
fido. Etenim si vt ex medicina nihil  
oportet putare proficisci, nisi quod  
ad corporis vtilitatem spectat, quo-  
niam ea eius causa est instituta, sic à  
legibus nihil conuenit arbitrari, nisi  
quod Reip. conducat: quoniam eius  
causa sunt comparatæ, & ad eius sa-  
lutem vtilitatēque referendæ: nos  
autem & priuatim & publicè profu-  
mus, profectò non potest hoc idem  
edictum & Reip. vtile esse, & commo-  
da nostra oppugnare. Et si vllò tem-  
pore res magna & ab omnibus vobis  
diligenter prouidenda ad Senatum  
delata est, hoc edictum certè eiusmo-  
di est, vt iudiciorum dignitas & con-  
seruatio, Senatus authoritas, libertas,  
amplitudo vestræ sapientiæ, fidei, po-  
testatīque commissā creditāque esse  
videantur. Nam vt non possunt vna  
in ciuitate multi rem atque fortunas  
amit

*Comprobatio à simili.*

*Rei grauitate.*

amittere, quin secum plures in eandem calamitatem trahant, ita multis ex hoc foro priuilegia & ornamenta adimi non possunt, quin vestra quoque dignitas imminuatur & labefactetur. Quis nanque putabit curiæ authoritatem, iudiciorum grauitatem, splendorem, amplitudinemq; Senatus remanere posse, nisi eos, qui ei sunt ornamento, cōseruaueritis? nisi eorū priuilegia confirmaueritis, quibus vos, ob hanc officij munerisque publicam societatem ac coniūctionē (qua nulla neque iustior, neque grauior causa necessitudinis potest reperiri) parentum loco esse oportet? nisi denique eorum dignitatem retinueritis, quos primos ac præcipuos iustitiæ ministros vos ipsi honorificentissimè publico in concilio nuncupare soletis? Vos enim, iudices, putare debetis esse quiddam nobis omnibus, qui

qui in hoc theatro versamur, inter nos commune atque coniunctum, ipsiusque aduocationis togatorum ornamentum ad omnium aliquem fructum & existimationem redundare, neque ipsis aduocatis separatim, inuitamentumque ad tempus hoc à maioribus concessum priuilegium, sed propter magna merita totius curiæ perpetuæ virtutis esse præmium. Adestote igitur, quæso, animis, iudices, & me non solummodò de aduocatorum commodis & rationibus, sed etiam de ordinis vestri authoritate, dignitate, amplitudine, deque totius Francici regni vtilitate verba facientem attendite, hancque in causa ostendite Remp. nostram habere multos Lusinos, Calatinos, Acidinos, Catones, Philippos, Lælios, id est, homines quorum sapientia temperantiâque in publicis priuatisque, forensibus, domesti-

*Captatio  
beneuolen-  
tiæ.*

mesticisque rebus ita perspecta sit, vt  
 ad certorum hominum importunā  
 auaritiam iura non cōstituantur, sed  
 eorum cupiditates excludantur sapiē  
 tia vestra, easque demum leges com  
 probetis, quæ sint accommodatæ at  
 que vtilēs Reip. aptæ commodis ve  
 stris: ac videte, ne vt maioribus vestris  
 pulcherrimum fuit tantam vobis fo  
 ri gloriam relinquere, sic vobis tur  
 pissimum sit, illud quod accepistis ab  
 huius inimici edicti iniuria vindica  
 re nolle, cū non multū interesse  
 videatur, præsertim in hoc Senatu,  
 vtrū ipse perniciosus legibus Rēp.  
 vexet, an alios vexare patiatur, nec  
 possit vlla esse excusatio, non dicam  
 malè sentienti, sed conuiuenti & dor  
 miēti Senatui. Aduocationis munus,  
 Patres grauissimi, tam honorificum  
 priscis seculis fuisse constat, vt non  
 solum posteaquā imperio omniū  
 gentium

*Qui pati  
 tur, consen  
 tire vide  
 tur.*

*A mune  
 ris honore  
 & autori  
 sale.*

gentium constituto diuturnitas pa-  
cis otium Romæ confirmavit, nemo  
ferè laudis cupidus adolescens non  
sibi ad dicendum studio omni eni-  
tendum putauerit, sed etiam summa  
in dignitate cōstitutī viri causarum  
agendarum curam & studium mini-  
mè contempserint. Memorix prodi-  
tum est Germanicum Caligulæ pa-  
trem virum quavis laude dignū etiā  
triumphalem causis orandis operam  
navasse. Ferūt quoque Vespasianum  
post tribunatum militum, quem ma-  
gna fama gesserat, operam foro de-  
disse. Hinc etiam Theodosij, Valen-  
tiniani, & Iustiniani cōstitutionibus  
postea comprehensum est, vt siue præ-  
torianæ, siue Illyricianæ, siue vrbica-  
næ, præfecturæ, siue prouinciarū ad-  
uocati post peractam integrè ac sine  
vlla opinionis labe prouinciæ admi-  
nistrationem, & post consiliarij depo-  
sitam

*Germani-  
cus causis  
orandis ope-  
ram dedit.*

*Et Vespas-  
ianus.*

*Constitu-  
tiones de  
advocatis.*

“

“

“

“

“

„ sitam sollicitudinem, & ad illud offi-  
 „ cium munúsve aduocationis, vnde  
 „ abstracti sunt, & vnde sibi vitæ sub-  
 „ sidia cōparabant, remeandi habeant  
 „ facultatem, nec causas orare denuo  
 „ quadam prohibeantur inuidia. Sed  
 nec fisci aduocatis post dēpositum  
 biennio completo officium licentia  
 facultásque denegatur tam pro se  
 quàm pro filiis, parentibus, vxoribus,  
 aliisque coniunctis personis postu-  
 landi, quamuis à priuatæ conditionis  
 hominum multitudine segregentur  
 & clarissimis connumerentur. Tan-  
 tum enim abest, vt postulādi munus  
 officiat nobilitatis splendori, vt etiā  
 nobilitet: eos præsertim qui in supre-  
 mo amplissimóque ordine illud exer-  
 cent. Adeò laudabile est, vel impera-  
 tore Anastasio assertore, vitæq; homi-  
 num necessarium aduocationis offi-  
 cium. Ideóque vt maximè principa-  
 libus

*Aduocatus  
 fisci clarif-  
 simis annu-  
 meratur.*

*Aduoca-  
 tionis mu-  
 nus quos  
 nobilitet.*



libus præmiis remuneraretur, & ne  
 aliis negotiis impliciti & illigati ad-  
 uocati, ab vtili & Reip. necessario co-  
 munere distraherentur, ante Anasta-  
 siū Theodosius & Valentinianus im-  
 peratores sanciuerunt, vt aduocatis à  
 nullo iudice, nec ab ipsa eminentissi-  
 ma præfectura, sollicitudo vlla peni-  
 tus iniungatur, sed vt neque aduoca-  
 tis prouinciarum vel spectabilium iu-  
 dicum quisquam existimet aliquid  
 iniungendū. Nulla igitur rogatis in-  
 spectio, nulla peræquatio ingeratur,  
 nulla operis cōstructio, nulla discus-  
 sio, nullum ratiocinium imponatur,  
 nullum denique aliud eis mandetur  
 præter arbitrium in eodem dūtaxat  
 loco vbi aduocationis exercetur offi-  
 cium. Cui constitutioni consentaneè  
 hoc vnum inter cætera aduocatis ma-  
 iores nostri priuilegium cōcesserunt,  
 ne extra hanc Basilicam litigare co-

*Aduoca-  
 tus non est  
 auocandus  
 à suo iudi-  
 ce.*

gerentur, sed apud requestarum Pala-  
tij iudices (qui & ipsi in ipsius curiæ  
collegium consortiūque, quò ma-  
iore eorum esset authoritas, assumpti  
allectisque sunt) vel ipsi experirentur,  
si quas sibi competere actiones puta-  
rent, vel lacesiti, eò reuocandi ius ha-  
berent. Id quod studiorum reueren-  
tia, vtilitatisque ratione suadente, &  
ad militum exemplum indultum esi-  
se, nemo est omniū meo iudicio quin  
facilè intelligat. Nam si Honorij &  
Theodosij, Iustiniani, aliorūque im-  
peratorum constitutionibus milita-  
res viri suos militares magistratus ha-  
bent, apud quos litigant, & si

*Militares  
magistratus  
habet.*

*Legibus antiquis castrorū, & more Camilli  
Seruato miles nec vallum litigat extra,  
Et procū à signis.--*

Et si iustissima Centurionum cogni-  
tio est de milite, quis feret aduoca-  
tos, qui hanc urbanam militiam re-  
spon

spondendi, scribendi, canendique se-  
 quuntur, litium suarum persequenda-  
 rum gratia ab aduocationis munere  
 auocari ac distrahi? Aduocati enim, “  
 inquit Leo & Anthemius impera- *Necessariū*  
 tores, qui dirimunt ambigua facta *aduocatio-*  
 causarū, suæque defensionis viribus *nis officiū.* “  
 sæpe publicis in rebus ac priuatis la- “  
 psa erigunt, fatigata reparāt, non mi “  
 nus prouidēt humano generi, quā “  
 si præliis ac vulneribus patriam pa- “  
 rentesque seruarent. Nec enim solos “  
 nostro imperio militare credimus il- “  
 los qui gladiis, clypeis, & thoracibus “  
 nituntur, sed etiam aduocatos. Mili- “  
 tant nanque causarum patroni, qui “  
 gloriosæ vocis confisi munimine la- “  
 borantium spem, vitam ac posteros “  
 defendunt. Vt nō immeritò alia Ho- “  
 norij & Theodosij constitutione ad- “  
 uocatis per Orientem eminētissimæ  
 Præfecturæ reuerentia studiorum sit

concessum, ut quicquid ex huiusmodi professione, vel ipsius occasione quæsierint, id post patris obitum, præcipuum, veluti peculium castræse, ad exemplum militum proprio domino valeant vindicare. Idem quoque postea indultum est patronis causarum illustris urbicariæ & Illyricianæ præfecturæ. Enimvero cum utriusque temporis, pacis videlicet & belli gubernandi æquè necessaria semper sit habita ratio, ut domi cōcordia, foris virtute & fortitudine Reip. status retineatur & conseruetur: hoc autem militum armis, illud verò prudentū consilio præstetur, rationi cōsentaneum fuit, ut paribus privilegiis, honoribus, nobilitatisque splendore decorarentur utrique, nec hi extra forum suum & tribunal lites suas persequi necesse haberent, sed ut iustissima est Centurionum cognitio de milite, sic

*Peculium  
quasi ca-  
stræse ad-  
uocatorū.*

*Et patro-  
nis cau-  
sarum.*

*Utriusque  
tēporis sem-  
per habenda  
est ratio.*

*Et simili  
confirmatio.*

vos ipsi de aduocatorum controuer-  
siis cognosceretis & statueretis. Qua  
de causa prudenter maiores, cùm cæ-  
teris præmiis dignos iudicassent eos,  
qui suo labore & periculo nostram  
Remp. defendunt, & pro ea pericula  
a tela subeunt, eosque laudis & glo-  
riæ studio ad ea suscipienda incendē-  
dos inflammandosque credidissent:  
sic eos, qui ea quæ in hoc Senatu tra-  
ctantur iudicia non sine magna ani-  
mi contentione & labore instruunt,  
inter cætera virtutis præmia dignissi-  
mos qui hoc priuilegij beneficio affi-  
cerentur, censuerunt, spèque amplif-  
simorum præmiorum ad hanc immē-  
sam fori exercitationem eliciendos  
inuitandosque existimarunt: veriti  
utique, ne cùm non nisi hi qui quoti-  
die diuque exercentur, huius autho-  
ritatem loci contingere audēt, quòd  
nihil huc nisi perfectum ingenio, cla-

boratum industria afferri oporteat, hic locus, nullis propositis, nedum interdiktis aut sublatiis præmiis, vacuus tandem ab illis & desertus relinquatur. Quo nihil sanè melius ac sapientius ab illis cogitari prouiderique potuit. Nam quamuis illud rectè quidè à summis dicatur Philosophis, fortes & sapientes viros nō tam præmia sequi solere, quàm ipsa rectè facta, satisque in ipsa conscientia pulcherrimi facti fructus esse debere, tamen sic vita hominum est, vt quemadmodū ad maleficiū nemo conatur nisi spe atque emolumento accedere, ita pauci post genus hominum natiū reperiuntur, qui hanc Philosophiam degustare vellent, vt nulla præmiorū spe ostensa Reip. utilitatibus & commodis inseruirent, quique laboribus susceptis periculisque aditis nullam rerum gestarum mercedem, aut certè

*Fortes & sapientes rectè facta sequuntur.*

gratiam desiderarent. Equidem multi & nostra & patrum maiorumque memoria summi in hoc tribunali aduocati extitere, & si meminisse libet, complures è vobis in eorum numero, indeq; curiæ adscripti, qui nunquam ad Remp. adducti essent, nec in hanc celsissimam sedem dignitatis atque honoris ascēdissent, sed obscuro & ignoti apud suos delituisse, eorumque præsidio caruisset Resp. nisi quædam laboribus suis propolita præmia existimassent. Etenim honos alit artes, omnesque incendimur ad studia gloria, iacentque ea semper quæ apud quosque improbantur: & vt ille inquit,

*Honos alit  
artes.*

*Gratis pœniat esse probum.*

Neque verò togatos tantum seu aduocatos multis magnisque honoribus, priuilegiis, & salariis cumulados & ornados censuerunt, sed etiam eos



*Immuni-  
tates pro-  
fessoribus  
concessa.*

qui Reip.vtiles & necessarias profite-  
rentur artes, sine quibus vix fieri posse  
animaduerterunt, vt quis pro digni-  
tate in eo munere se gerat. Nam vt  
ea omittam quæ Iulius Cæsar, Augu-  
stus, Vespasianus, Antoninus Pius in  
liberalium artium professores & me-  
dicos beneficia, salaria, immunita-  
tésque contulisse memorantur, titu-  
lo de professoribus & medicis, libro  
decimo Codicis Iustiniani, & titulo  
de professoribus qui in vrbe Constan-  
tinopolitana docētes, ex lege merue-  
runt comitiuam, libro duodecimo  
eiusdem Codicis, magnas prærogati-  
uas & immunitates in eos professores  
& medicos ab imperatoribus Roma-  
nis collatas fuisse legimus. Qui tamē  
omnes à nostris omni munificentia  
humanitatisque genere, quo litera-  
tos & doctos homines hactenus pro-  
secuti sunt, victi superatq; sunt. Non  
enim



enim eos solummodò qui profitetur  
 & in scholis vel Grammaticam, vel  
 Rhetoricam docent, priuilegiis or-  
 narunt, iisque suos certos & delega-  
 tos iudices apud quos litigarent dede-  
 runt, sed etiam ipsos magistellos abe-  
 cedarios (quorum illi tamẽ viliorem  
 operam iudicarunt, quàm vt vlla im-  
 munitatis prærogatiua decorarent)  
 eodem loco & numero habuerunt:  
 quinimò iis omnibus qui vel sex tan-  
 tummodò menses continuos bonis li-  
 teris operam nauauerint, eadem pri-  
 uilegia beneficiâque cõtulerunt. Sed  
 nec vllum certum numerum præsti-  
 tuerunt qui iis fruerentur. Adeò cun-  
 ctos ciues suos omni scientiarum &  
 disciplinarum genere excultos red-  
 dere studuerunt, & quibuscunq; po-  
 tuerunt modis ad earum capeffenda-  
 rum studium inuitarunt. Quorum  
 equidem conatus & spes haudqua-

*Magistelli  
 abecedarij  
 certos ha-  
 bent iudi-  
 ces.*

*Nulla ta-  
 men immu-  
 nitatis præ-  
 rogatiua  
 gaudent.*

quam eos fefellit. Nā cum in omnibus huiusce regni vrbibus, pagis & villis, tum maximè in hac ciuitate (quæ illis omnium doctrinarum inuentricibus Athenis eruditione longè proculdubio antecellit) tanta copia est omnium ordinum eruditorū hominum, aduocatorū potissimū, vt ludum literarium verius, quàm vrbis formam vllam esse credas. Ad cuius amplissimum hunc Senatum (in quo iura populi Gallici, monumenta maiorum, omnis sapientiæ ratio, omnisque doctrina literis mandatur) ex reliquis ciuitatibus, academiis & prouinciis totius Francicæ iuuentutis, tanquam ad oracula, perpetuum quotidianūque cōcursum fieri nemo non videt, vt ad eam doctrinam, quam suo quisque studio consecutus est, in hac magnitudine & varietate multitudinēque in omni genere causarum

-farum adiungat vsum frequentem,  
qui omnium magistrorum præcepta  
superat. Ex quo etiam prouinciarum  
iudices, velut ex equo Troiano, seu  
seminario aut ludo aliquo, in numeri  
nullo non die exeunt, indéque totius  
regni iure & æquitate moderandi ra-  
tio peti solet: ita vt nullus locus sit in  
hoc regno, in quo non extent huius  
Senatus cum eruditionis & doctrine,  
tum verò vsus, tum consilij & sapien-  
tiæ impressa vestigia, nec vllis fatis  
amplis honoribus & præmiis cumu-  
lari ornarique posse videantur, nedû  
iam datis excludi aut priuari debeant  
ij, ex quorum potissimum ordine splê-  
dor atque ornamentum curiæ consti-  
tuitur, & qui in ea scientia elaborât,  
quæ omnibus sit profutura, vndéque  
tot tantâque regni commoda petun-  
tur. Legimus Solonem Salaminium  
sapientissimum latorem legum præ-  
mia

*Premia  
decreta à  
Solone Sa-  
laminio.*

mia decreta iis, qui in Olympiis aut Nemeëis vicissent contraxisse, eaque maiora decreuisse iis, qui in bello pro patria fortiter occubuissent, quòd illi magnis impendiis & sumptibus exercebantur, senesq; facti nec bello utiles nec gerendæ Reip. essent accommodi, hi verò saluam eam fecissent. Id quod si rectè prudentérque ab eo factum esse iudicandum est, vt certè de tanti viri iudicio & prudentia dubitare mihi religio est, quis hoc ei cõuenientissimum inficias ierit, vt non modò iisdem honoribus & priuilegiis, quibus liberalium artium professores & medicos, propter eam, quam Reip. & studiis nauant operam, frui lætandum est, sed etiam longè maioribus gaudeant ij qui omni cura, attentione animi, cogitatione, vigilantia, assiduitate, labore, amicorũ controuersias causasque tuentur, laborantibus

*Comparatio aliarũ scientiarũ cum aduocationis munere.*

tibus succurrunt, egris medentur, afflictos excitant, homines in ciuitate retinent? Quo quid liberalius, munificentius, ipsiq; Reip. utilius euenire potest? Quæ officia ac merita quis ab illis doctrinarum studiosis umbratilem illam vitam, quietã, atque otiosam sequentibus requireret? Quã enim supplicibus opem ferre, quem afflictum excitare, quam salutem dare, quem liberari periculis poterunt? Omitto quòd non in vniuerso genere scientiarum singuli, sed aliqua in re vna separatim versentur. Alij enim Mathematicis artibus penitus dediti sunt, alij Musices studio tantummodò incumbunt, alij totos se ad Grammaticos, alij ad Poëtas contulerunt, alij naturæ vim, alij astrorum cognitionē singulari studio & labore persequuntur, omnéque tempus atque ætates suas in iis artibus & disciplinis

*Advoca-  
tionis mu-  
nus ex om-  
nibus arti-  
bus colle-  
ctum.*

nis consumunt. At maius est profe-  
ctò hoc quiddam aduocationis mu-  
nus pro dignitate præstare, cum ex  
omnibus iis artibus & studiis sit col-  
lectum, nec, mea quidem sententia,  
possit esse quisquam omni laude cu-  
mulatus causarum patronus, nisi o-  
mnium rerum magnarum atque ar-  
tium rationem naturamque compre-  
henderit, & earum scientiam erit cō-  
secutus, ut ex earum cognitione efflo-  
rescat & redundet oratio. Quocirca  
præclarè maiores, ob eorum studiorū  
reuerentiam, & ut eum verum, iustū,  
infinitum, officiosum, atque honestū  
rerum forensium laborem honori-  
bus, priuilegiis, atque splendore deco-  
rarent, amplissima ei studio proposi-  
ta esse præmia voluerant, vel ad gra-  
tiam, vel ad opes, vel ad dignitatem.  
Quibus tamen ornamentis omnibus  
& commodis hodie spoliamur. Et-  
enim

enim quam non inuidiæ falsæ atque iniquæ molem, tempestatémq; subeunt ac sustinent ij, qui in hoc immenso, infinitoque labore, summo etiam nonnunquam vitæ cum discrimine, versantur? quid non eis summam per iniuriam inimicum atque infestum? Sic est meherculè hic ordo quasi propositus atque editus in altum, ut ab omnibus ventis inuidiæ circumflari posse videatur. Estq; huius seculi labes quædam & macula virtutis inuidere, velle ipsum florem dignitatum infringere. Quæ verò non insidiæ in eos ab iis struuntur, qui Sulpitij Antisenatum in Rep. nostra (hac enim oratione me uti Resp. & dolor meus, & istorum iniuria cogit) renouari fortasse cuperent, ut scilicet in hoc regno nihil valeret Senatus, omnis esset impunitas, nulla iudicia, nulli possessionum termini, nulla lex,

nul

*Virtuti inuidere huius seculi labes.*

*Sulpitij Antisenatus.*



nullum ius ciuile, vis & ferrum in foro versarentur, priuati se parietum præsidio, non legum tuerentur, ad magistratuum domos cum ferro & facibus iretur, Dei Opt. Max. tēpla incenderentur? Quòd si tantulūm oculos deiecerimus, præstò esse insidias, si vllum locum aperuerimus, non dico crimini, sed suspicioni, accipiendum esse statim vulnus, esse nobis vigilandum, semper laborādum videmus, quasi cum omnibus improbis æternum nobis bellum sit susceptū, qui quasi natura & genere disiuncti sint, ita dissident à nobis animo ac voluntate, quique vos etiam non solum iccirco oderūt, quòd eorum conatus impios & facta cōscelerata reprimitis, sed etiam eò magis, quòd nihil iam se simile florente Senatu conari posse arbitrantur. Ad quā peruersitatem, inuidiam, contumeliam, obtre



obtreſtatorúmque calumnias illud quoque incommodum & iniquitas acceſſit, quòd ad quam meſſem auream, vt Stratocles & Dromoclides ad ſuum tribunal, ſeſe inuitare poterant cauſarum patroni, eam nũc vix argenteã aut plumbeam reperiant, ita vt

*Meſſis au-  
rea verſa in  
argenteam,  
vel plumbeã.*

*Nec me verbosas leges ediscere, nec me*

*Ingrato voces proſtituiſſe foro,  
quicquam in poſterum profuturum  
eſſe videatur, quoniã vt eſt Satyricũ,*

*--Hinc centum patrimonia cauſidicorum.*

*Non tantum valebunt, quantum*

*Parte alia ſolum reus Hiſapone lacertæ.*

*Itaque è gloſſis noſtris expungendos  
eos vulgatos verſus,*

*Dat Galenus opes, dat ſanctio Iuſtiniana:*

*Ex illis paleas, ex iſtis collige grana.*

*Non enim amplius grana, ſed ne vix  
quidem paleæ ex hac meſſe colligen-  
tur. Quamobrem nec illud nobis ſpe-*

*Ad hono-  
res virtute  
peruenien-  
dum.*

randum est, ut qui antea semper opti-  
mo cuique, præsertim in literis & fo-  
ro exercitato, patuit aditus ad hono-  
res, is aduocatis hac tēpestate detur,  
cū propter cōmunium temporum  
iniuriam, non gradu aut eruditionis  
commendatione, sed fauore, hæredi-  
tate, pecunia ad eos perueniri vulgò  
persuasum sit, nec ita multos L. Phi-  
lippos, Cottas, Curiones, Q. Pompe-  
ios, aut Cicerones. repetiri, qui verè  
gloriarī possint, se sine vllō munere,  
vel sine vlla maiorum commēdatio-  
ne, adeptos esse omnia quæ habentur  
amplissima. O frustra ergo in studiis  
colendis susceptos labores! ô spes fal-  
laces, ô cogitationes inanes! Quid e-  
nim tam sanctum, syncerum, aut re-  
ligiosum esse potest, quod hi graues  
communium temporum casus (hor-  
tantur enim me vultus vestri P. C. ut  
quod audio, quòdque res ipsa tacitè  
clam

clamare videtur, liberè dicam) vænale quodammodò aut proscriptũ non fecisse dicuntur? quem rerũ delectum atque discrimen non turbasse aut sustulisse? quid quod erat ætatis & ordinis, non permiscuisse? Ex quo euenit vt plerique ad honores adipiscendos & ad Remp. gerendam nudi veniant atque inermes, nullo imbuti vsu, nulla scientia ornati. Quod si ita est, videte, iudices, ne sit contumeliosum & inhumanum, quid ad eas ruinas, quibus opprimimur, acerbitalis addere, ne sit periniquum & non ferendum, vt iis quibus omnes etiam voluptates omittendæ, relinquenda studia delectationis, ludus, iocus, cõuiuium, sermo etiam omnium penè familiarium deferendus, quibus multũ de nocte vigilandum, laborandum, multorum ineptiæ ac stultitiæ deuorandæ ac perpetiendæ, arrogantia perferen-

*Nudi ad  
Rempub.  
gerendam  
nō admittendi.*

da, difficultas exorbenda, ad aliorum arbitrium non ad suum viuendum, vt in hoc forenſi labore & aſſidua exercitatione verſentur, id priuilegium quod eis ſolūmodò ex omnibus commodis & ornamentis, velut ſimulacrum priſtinæ vtilitatis relictum eſt, adimatur, iis que præmiis & honoribus excludantur, quæ ſi commendatione & iudicio vetuſtatis cōprobatæ non eſſent, nunc voluntate ſententiis que veſtris eſſent concedenda & comprobanda (id que maximè cum non pecuniarium præmium, non agrorum aſſignationem, non vectigalium obuentionem, non denique pretium pro rectè factis, ſed honorē ita vt factitatum eſt, pro beneficio forenſique induſtria poſtulent) tum ne abſtraherentur, vt antè dixi, ab hac exercitatione & conſuetudine dicendi populari & forenſi, tum vt ſuper eſſet aliquod

*Honor pro  
forenſi in-  
duſtria nō  
denegap-  
da.*

aliquod in Rep. nostra rectè factis  
 propositum præmium: si modò hoc  
 virtutis præmium existimandum est,  
 quod patet volenti ferè cuilibet am-  
 bitiosè quàm contendenti & præhen-  
 santi, quod patet quibuslibet fere au-  
 licorum seruis, quod etiã mirum est,  
 ni patere debuisse dicant, non tãtùm  
 Quæstoribus & Tribunis ærarij, sed  
 etiam omnibus aliis qui in aliqua vi-  
 li numorum & æris tractatione ver-  
 santur: qui tamen quod commodum  
 & ornamentum à Rep. optare aut spe-  
 rare debent, nisi vt qui ex iis supra  
 modum patrimonij nimium aucti lo-  
 cupletatiq; sunt, tanquam prædo-  
 nes, ærarij depeculatores, & in mani-  
 festo furto deprehensi turpiter & igno-  
 miniosè in loco & sepulchro maio-  
 rum ad Monfauconem vitam finire  
 cogantur? Quæ enim furandi gene-  
 ra in tantis his angustis ærarij & im-

*Depecula-  
tores æra-  
rij quos sup-  
plicio puni-  
di.*

peditis temporibus ab illis excogitata vulgò non creduntur? quæ non occultis furtis auersa pecunia publica? Quibus de tam impudentibus latrociniiis nemo aut satis commodè dicere, aut satis grauitè conqueri, aut satis liberè vociferari potest. Admonet me hæc res, ne id hoc quoque loco silentio præteream, non iis tantùm ciuibus qui se suarum rerum finibus continent, & qui cum quadam elegantia atq; integritate viuunt, id priuilegij datum esse, ne alibi quàm apud ordinarium suum iudicem siue in rem, siue in personam agatur, conueniri possint, sed etiam cetariis, laniis, cocis, fartoribus, piscatoribus, vnguentariis, saltatoribus, baiulis, omnibus denique mercenariis opificibus & mercatoribus, qui in sordida arte versantur, quique nihil proficiunt nisi admodum mentiantur. Addendum

*Mercenarij opifices  
apud ordinariū suū  
iudicem cō-  
ueniendi*

dum etiam eidem esset, multos alios inferiorum viliorumque ordinum viros ob nullam virtutem tali honore dignatos esse, ut de sua gloria, cum pari premio tales homines affici videant, delibati, meritissimo queri possint aduocati. Sed multa sunt consultò prætereunda, ne quis imperitior orationem nostram in peiorem partem vertat ac mutet, nosque existimet non tam innocentia quam criminationibus, & per aliorum incommodum & calamitatem causam nostram tueri probaréque velle. Reliquum iam igitur est, P. amplissimi, ut his qui huic nostro privilegio causæq; obtreçant, minimo cum fastidio satisfaciamus. Quamobrem dum his breuiter dilucidéque respondeo, quaeso, ut adhuc, iudices facere instituitis, méque audiuiſtis, item quæ reliqua sunt benignè attentéque audiatis, profectò ni-

*Responsio  
ad aduer-  
sarioꝝ ar-  
gumenta.*

*Repetitio  
benenolen-  
tia.*

hil à me dicetur, quod non dignum  
 hoc conuentu & silentio, dignum ve  
 stris studiis atque auribus esse videat  
 tur. Neque me impedit, iudices, ini  
 micum edictum, temporis iniquitas  
 atque inuidia communis, quominus  
 fretus vobis constanti, perpetua, for  
 ti, inuictâque defensione vtar. Certû  
 enim deliberatûmque mihi est, quæ  
 ad causam pertinere arbitror, nō mo  
 dō dicere, verumetiam libenter, au  
 dacter, liberêque dicere, quòd malè  
 aliquem locutum non putem, si verè  
 ac liberè locutus fuerit. Itaque quæ  
 mihi ipsi indigna & intolerabilia vi  
 dentur, quæq; ad omnes, nisi proui  
 demus, arbitror pertinere, ea pro ad  
 uocatione togatorum ex animi mei  
 sensu ac dolore pronuntiabo: idque  
 cò lubentius & diligentius à me fiet,  
 quòd intelligam (renouabo enim id  
 quod

*Occurrit  
 obiectioni.*

*Qui verè  
 ac liberè lo  
 quitur, ma  
 lè non lo  
 quitur.*



quod initio dixi) hanc totam ferè legem ad vestram dignitatem minuendam tãquam machinam comparari, idque vnum agi, id cogitari, in eo elaborari, insidiàsque fieri vestræ auctoritati simulatione publicæ utilitatis. Quibus insidiis tantò magis à vobis est occurrendum, quantò hæ sunt occultiores, quæ latent in simulatione officij. Nam eum qui palam est aduersarius, facilè vitando cauere possis, hoc verò intestinum atque domesticum malum non modò non existit, verumetiam opprimit antequam perspicere atque explorare potueris, non secus ac prius nocere quàm sciri curarique potest quod intra cutem subest vulnus. Eorum igitur cõmentum, quo apud priuatum concilium vsi sunt, vt mutum forum, elinguem, tacitam & fractam curiam, suo denique spoliata ornamento redderēt,

*Quanto insidie sunt occultiores, tanto magis occurrendum.*

cognoscite. Graue & iniquū esse clā-  
mitant, quenquam huius priuilegij  
ratione è longinquis regni prouin-  
ciis controuersiarum disceptandarū  
causa Lutetiam Parisiorum euocari,  
iurisdictione ordinaria subtrahi, li-  
tium sumptibus vexari. ô præclaras,  
& regia liberalitate ac munificentia  
rationes dignas! Quis hoc eis non cō-  
cedet, neminem litium sumptibus ve-  
xandum? Ecquod ergo non amplif-  
simum à Rege præmium optare de-  
bent, qui se rationem, si diis placet,  
inuenisse arbitrantur, qua prouincia  
les homines molestiis, expensis, vexa-  
tionibus liberentur? quasi verò tantæ  
stultitiæ condemnandi sint maiores  
nostri, sapientes alioqui illi, ac mul-  
tū in posterum prospiciētes, vt vos  
iudicetis huius rei incommoditates  
omnes in mentem eis non venisse.  
Sed non intelligunt politici isti ho-  
mines,

mines, quos suprà deformaui, si eorū  
rationibus vtendum erit, non modò  
suprēmas curias, sed nec prouincia-  
les magistratus, ac ne vix quidē ipso-  
met huius edicti architectos & ma-  
chinatores suo in loco fortasse confi-  
stere posse. Singulis enim in oppidis,  
pagis, villis, atque adeò familiis ius  
constituendum reddendūque esse  
fateantur necesse est, tum ne homi-  
nes itineribus sumptibúsque vexētur,  
tum ne agrorum cultura deseratur.  
Nam cui miserum atque indignum  
non videbitur ex agro homines tra-  
duci in forum, ab aratro ad subfellia,  
ab vsu rerum rusticarum ad insolitā  
litem atque iudicium? Nulla iam igi-  
tur prouocatio ad Senatum, nullum  
rescriptum à Principe requirendum  
erit, sed in amplissimo Gentiliaci tri-  
bunali ius grauissimè & seuerissimè,  
sine vlla prouocationis ad superiorē  
iudī

*Absurda  
necessario  
aduersario  
rum partē  
sequentia.*

iudicem suspicione, à villicis ipsis & aratoribus dicetur. Et si longius progredi fas est, non in maioribus urbibus tantummodò episcoporum & archiepiscoporum sedes & authoritas constituenda erit, & collocanda, sed singula oppida, pagi, vici, ac familiae suos sibi eligent & constituent antistites, episcopos, & archiepiscopos. Magnum verò concilium, quod nullo certo loco circumscriptum, sed incertis sedibus huc atque illuc vagatur, quo utilitatis colore seipsum sustentare suamque authoritatem tue-ri poterit? In quo maiorem litigantium vexationem quàm vlla in alia iurisdictione, propter tum itinerum longinquitatem, tum loci incertitudinem quis non confestim conquere-  
retur? ne quid dicā de sportulis, quas plerique etiam multò maiores illic quàm in ipso supremo Senatu exigunt, sæpe

sæpenumero conqueruntur. Postremo omnis à maioribus Reip. gubernandæ bene constituta ratio & disciplina tollatur, omniâq; infima summis paria fiant, turbentur, misceantur, & ad antiquum illum agrestem & inciuilem hominum vitæ cultum reducamur. Quo quid miserius ac stultius? quid tam insolens, peruersum, præposterumve fingi, dici aut cogitari potest? vt Remp. quam nunc bonis institutis & legibus temperatam tenemus, nullam iam habere incipiamus? Memoria teneo, Iudices, Platonis fuisse dictum, beatas tum fore ciuitates, quãdo aut Philosophi eis imperabunt, aut, qui eis præerunt, philosophabuntur. Quod vt grauiter sapienterque ab eo dictum fuisse existimandum est, ita magnas fortè pariet incommoditates & perturbaciones, si id ad strictam subtilémque Philosopho

*Platonis dictum.*

*Discrimen  
legū à Phi-  
losophis.*

losophorum rationem referendum  
esse putauerimus. Aliter enim leges,  
vt disertè quidem ille ait, aliter Phi-  
losophi de hominum negotiis, vita,  
& moribus disputant. Leges, quate-  
nus res manu tenere possumus: Phi-  
losophi, quatenus ratione & intelli-  
gentia. Quæ sententia quam vim ha-  
beat, vt intelligamus, horum discipli-  
næ iurique naturali illud consenta-  
neum est (quod & iuris nostri autho-  
rum libris passim continetur) nemi-  
nem locupletiores fieri debere cum  
iactura & incōmodo alieno, & quod  
iam semel nostrum factū est, ad aliū  
sine nostro facto transferri nō posse.  
A quibus tamen regulis prudentum  
interpretatione, legēque Ciuili quo-  
dammodò recessum esse videtur so-  
cietatis humanæ conseruandę causa.  
Factum est enim incertitudinis do-  
miniorum vitandæ, litiūque finiē-  
darum

*Nemo lo-  
cupletari  
debet cum  
iactura al-  
terius.  
Quod no-  
strū est sine  
facto nostro  
ad aliū  
transferri  
non potest.*

darum gratia, vt qui legitimo tempo-  
 re rem alienam bona fide possederit,  
 eam aduersus ignauum, quamlibet  
 verum dominum, vsucapiat, eiúsque  
 verus dominus esse intelligitur. Quò  
 etiam pertinent ea quæ de libertate  
 naturali & seruitutibus à nostris co-  
 piosè tractantur. Vnde & ex multis  
 aliis prudentum disputationibus in-  
 telligi debet, hanc à diis constitutam  
 hominum consecrationem & com-  
 munitatem regi retinerique vix pos-  
 se, si eam ad Philosophorum præce-  
 pta rectamque intelligentiam reuo-  
 care voluerimus. Quæ enim maior  
 in Rep. perturbatio fuerit dominiorũ  
 incertitudine? Qua ex re vberius litiũ  
 ac inter ipsos homines dissensionum  
 prodibit seminarium? Quæ non mul-  
 tò maior commoditas ex dominorũ  
 imperio & seruorum obsequio profi-  
 ciscitur, quàm ex vaga illa & otiosa  
 liber

*Dominio-  
 rũ incerti-  
 tudo ma-  
 gnam Re-  
 pub. pertur-  
 batio.*



libertate naturali? Ideoque vt ius tradat, vt idem ille inquit, vtilitatem necessitatēque flagitare vsu comper-  
tum est, & vt eorum Philosophorum acutas subtilēsque rationes quandoque vel negligamus, vel ciuili interpretatione ad hominum captum v-  
sūque accommodemus. Vt eū nulla lex, nullum senatusconsultum, nullum magistratus edictum, non infirmari aut conuelli non potest, si ad  
subtilitatē æquitatem deflectere ve-  
limus, consilium autem eorum qui  
scripserunt, & rationem & authori-  
tatem relinquamus, ita nulla nō vin-  
cula non reuellentur, non modò iudi-  
ciorum, sed etiam vtilitatis vitæque  
communis, si ad callidas versutāsque  
istas subtilitates politicam discipli-  
nam deflectēdam putemus, quid au-  
tem ipsorum hominum vsus ferat  
negligamus. Multa siquidē sunt quæ  
ad

*Æquitas  
deflectenda  
non est ad  
subtilitatē.*



ad rationem ciuitatis & communem opinionem si dirigas & accomodes, recta sunt, sin perpendere ad disciplinę præcepta & in disputatione limare velis, reperiantur prauissima. Viuitur enim non cum perfectis hominibus planéque sapientibus ac intelligentibus, sed cum eis in quibus præclare agitur si sint simulachra virtutis rectæque intelligentiæ. Sed ne nimiũ longius abeamus, hoc istis nostris Philosophis, id est, huius bellissimi edicti concinnatoribus demus, naturali æquitati conuenire, ne homines litium sumptibus & itinerum lōginitate vexentur, quibuslibet tenuissimis in oppidis, vicis atque adeò familiis magistratus, antistites, duces creandos esse ac constituendos, quis tam hebes rerumque ignarus, vt non sentiat hanc communionem societatemque ciuilem, quæ in primis religio-

*Societas ciu-  
nilis neces-  
sario con-  
seruanda in  
Repub.*

fè colenda est & conseruanda, ex eo  
 planè labefactari atque subuerti? flo-  
 rentem diuinitúsque hominibus con-  
 cessum Reip. statum philosophicis iis  
 rationibus & consiliis nullum consti-  
 tui? Deus bone, quid ad hanc demen-  
 tiam addi potest? quid hoc enim est  
 aliud quàm tollere è vita vitæ socie-  
 tatem? Omittamus igitur hãc docto-  
 rum hominum in legibus ferēdis in-  
 utilem peruersãque sapiētiã. Nam  
 vt graue molestúmque videri queat,  
 aduocatorum priuilegiis Lutetiã Pa-  
 risiorum quenquam euocari, iurisdic-  
 tione sua subtrahi, expensis vexari,  
 grauius multò certè erit minúsque fe-  
 rendum, hoc omnis iustitiæ & æqui-  
 tatis asylum eorum patrociniò orba-  
 ri, summa vtilitate & maximo sæpe  
 præsidio in periculis carendum esse,  
 hanc totius regni quasi iudiciariam  
 scholam desertam vacuãque red-  
 di,

*Totius re-  
 gni iudicia  
 via quasi  
 schola de-  
 ferta reddi-  
 tur.*

di, minúsque incommoditatis & detrimēti in ipsa itinerum sumptuúm-  
que vexatione rem istam totam pro-  
pius confyderantibus ac perpenden-  
tibus videbitur esse, quàm vtilitatis in  
istorum commentitia fallacique cō-  
moditate. Neminem autem esse pu-  
to, iudices, qui ignoret, id ferè vfu ve-  
nire, vt quemadmodum ij qui egre-  
giis memorabilibúsque ornātur vir-  
tutibus, iidem multis magnisque cu-  
mulātur vitiis: ita vix sit, vt magnam  
inter homines reperias commodita-  
tem, quam non statim è vestigio con-  
sequatur quædam incōmoditas. An  
non solis, aquæ, aëris, terræ sua quæ-  
dam sunt incommoda, quæ tamen  
perpeti multò melius est, quàm eorū  
vfu & commoditate omnino priua-  
ri? Ecquis, quæso, ditescit nisi cum ali-  
quo aliorum incōmodo, quantumuis  
rem bonis & honestis rationibus au-

*Omne com-  
moditatem  
sequitur in-  
cōmoditas.*

geat? Senatus verò ipse quî suû splen-  
dorem & auctoritatem tueri retineré-  
que poterit, nisi cum aliqua litigan-  
tium itinerum sumptuûmque vexa-  
tione, in qua quiddâ inesse mali quis  
negat? Sed bonû quod est quæsitum  
in ea sine isto malo non haberemus.  
Quare si tribunitiam potestaté prin-  
cipes Romani, quamvis pestiferam  
in seditione, & ad seditionem natam  
nimiâmq; tolerabant, quòd vim po-  
puli multò vehementiorem, multòq;  
fæuiorem quæ ducem quòd haberet,  
interdû lenior esset, quàm si nullum  
haberet, reformidabant: quis non le-  
uem illam itinerum sumptuûmque  
incommoditatem ferendam potius  
existimabit, quàm istam iudiciorum  
euerfionem, vitæque civilis perturba-  
tionem? hoc loco memini, clarissime  
Abote, ad cuius fidem opémque to-  
tus hic noster ordo cõfugit, quémque  
causæ

*Tribunitia  
potestas ad  
seditionem  
natam.*

causæ nostræ propugnatorem elegimus, qui preces nostras & desyderia ipsi curiæ, in qua triginta ab hinc annis magna cū nominis existimatione & splendore cōsiliarij munus obisti, explicares & probares, memini, inquam, me aliquando de te inter deambulandum cum ornatissimo viro Ioanne Texæo inquisitoriarum classium præside, audiuisse id, quod Metellus ille Romanus de vxorum vsu necessario malo in concione dixit, non inscitè ad hanc itinerū & sumptuū vexationem, de qua tum etiam grauis quorūdam erat querimonia, accommodari posse, vt nō solūm necessarium malum, quo tamē vos quidem exemptos omnes esse cupiebatis, sed etiam magnopere optandum bonum videretur, nempe vt hoc natura nimiū litigiosum, & ad rixam concitum hominum genus à tribu-

*Metelli dictū de vxorum vsu necessario malo.*

*Itinerū sumptuumq; vexatio necessarium malum.*

nalibus repelleretur: idque hominibus magnopere expedire intelligi nō ad æquitatis quidem conditionem, sed ad minima malorum eligenda. Qua de causa quod isti litigantium sumptus huic suo populari edicto prætexunt, id nō modò priuilegij nostri infirmandi iustam rationem non habet, imò eius instituendi iustā causam, etiam si nulla alia subesset, supeditaret, si Cætonis sententiam recipiendam putauerimus, qui iudicum tribunalia muricibus esse sternenda dicebat, ne temerè ad litigandum homines accederent. Quòd si verò tandem hoc aduocatorum priuilegium iccirco vel vlla quidem ex parte diminuendum aut adimendum esset, quòd aliquid incommodi & iniuriæ habere videatur, cui perspicuum non est, id quoque consequi, nō certarum personarum solummodò, sed etiam omnium

*Iudicū tribunalia  
muricibus sternenda.*

omnium aliorum ordinū, collegiorum, generum, & rerum priuilegia, immunitates ac prærogatiuas nō tantū ad incertum reuocandas, sed infringendas, planēque tollendas esse. Quid enim aliud existimare debemus priuilegium dici, nisi quandam æquabilis communisque iuris priuationem & exceptionem certis quibusdam personis, rebus, collegiis, aut prouinciis virtutis aut utilitatis ergò concessam? Iam igitur fiscus priuatorum iure vtetur, magistratus suis insignibus, ornāmētis, ac dignitate spoliabuntur, militis nullum erit testamentum, nisi paganico more & solēnitatibus adhibitis fuerit cōfectum: annona ipsa nullis fulcietur priuilegiis, ipsi denique virtuti nullum erit propositum præmium. Qua iuris æquabilitate quæ maior iniquitas in Rep. inueniri potest? quid exitiosum

*Privilegiū  
definitur.*

*Absurda.*

magis? quæ nocentior ingratitude? ut  
 segnes & ignavi cum strenuis & for-  
 tibus, improbi & scelerati cum opti-  
 mis & summa virtute præditis ciui-  
 bus pari iure censeantur esse? quid por-  
 rò iniquius quàm de optimo, de iu-  
 stissimo, de honestissimo genere ho-  
 minum, id est, de aduocatis ea iura cõ-  
 stituere, quæ omnia aliorum subuer-  
 tant? (Quanquam ut sacratæ leges &  
 duodecim Tabulæ priuilegia irroga-  
 ri, hoc est, leges in priuos seu singu-  
 los ferri vetabant, quòd id malo mo-  
 re maloque exẽplo fieret, ita hoc prin-  
 cipum nostrorum animis infixum &  
 quasi insculptum esse vehementer o-  
 ptandum est, præmia virtutis & offi-  
 cij sancta & casta esse oportere, neq;  
 ea aut cum improbis communicari,  
 aut in mediocribus hominibus per-  
 uulgari, sed dignis tantùm & bene de  
 Rep. meritis concedi debere, quòd si  
 nimiũ

*Priuilegia  
 à legibus  
 12. Tabu-  
 larũ veti-  
 ta ferri in  
 priuos.*



nimum peruagētur, id est, passim sineque delectu permittantur, verendū sit, ne eorum ingenia, qui ea iam præditi sunt, corrumpantur, & qui eam nondum assecuti sunt, insolentiores euadant, eiúsque præmio peruulgato studiū negligāt.) Non dico quā id absurdum sit & indignum, aduocatos coram iis iudicibus lites suas persequi, quorum ipsi controuersias sæpenuerò primo certamine & ex tempore decernunt ac dirimunt. Illud autem quero qua vanitate, qua fide, quaque religione de prouincialiū iudicum controuersis decernent, in eosq; scribēt aut consultabunt, quos intelligent litium suarū, quas in prouinciis habituri sunt, disceptatores similiter & iudices fore? Qua porrò grauitate, quo studio, quaque contentione in eos, à quibus erit prouocatū, in hoc cōuentu dicent, vt eorum sen-

*Non facile  
contra iudi-  
ces propria  
causæ con-  
sultandū.*

tentiæ contra ius morémque maiorũ  
 lata rescindantur? Nemo est, meo iu-  
 dicio, ex hac corona quin videat, nul-  
 lo non ferè confessu de quorundam  
 eorum iudicum (ex quo potissimùm  
 tempore præsidialium magistratuũ  
 potestas constituta auctaque est) in-  
 ficitia, imbecillitate, sordibus, & iniu-  
 stitia apud vos queri, eorum fraudes  
 & ignorationem aduocatorum ope  
 ac diligentia detegi, eorũ denique iu-  
 dicia ab inimicitiiis, largitione, iurís-  
 que ignoratione profecta vobis iudi-  
 cibus irrita constitui ac declarari.  
 Quorum emēdatio & coërcitio quæ  
 sperabitur, si aduocati seuerius agere,  
 eosque dicendo perstringere non au-  
 debunt? Prætereo quoque, neminem  
 inueniri posse, qui in licarium, præ-  
 donem, grassatorem, effractorem, vel  
 alium quẽuis potentio rem hominẽ  
 dicere, patrociniũque præstare au-  
 deat,

*Pericula  
 ex inimi-  
 co edito  
 nascentia.*

deat, cum intelliget sibi, alieno forte tempore ac difficillimis itineribus, litium suarum gratia Aureliã, Lugdunum, aut aliam in urbem vel prouinciam esse proficiscendum: cum etiam nuper in hac urbe, luce proculdubio atque arce regni, doctum quendam ac optimum nostri ordinis virum, ob susceptam à se & grauitè actam amici causam, miserè indignèque glandetraiectum, ac de medio sublatum esse, vos audiuisse ac meminisse non dubitem. Nec quèquam mouere debet, iudices, quod à nonnullis dici audio, per procuratorem aduocatis licere lites suas persequi: itaque earum gratia necesse non esse urbe excedere, aduocationisque munus deferere. Nam si de vniuersis bonis, vel maiore parte eorum agetur, qui non posthabitis omnibus aliis rebus & negotiis, omniq; viarum & itinerum difficul

*Quidã ob defensam amici causam glandetraiectus.*

*Confutatio obiectionis.*

ficultate neglecta mallent præsentēs  
causæ suæ adesse, quàm eius iustitiam  
iis procuratoribus committere, quo-  
rum non tam quidem fidem suspectā  
habebunt, quàm vsus forensis & iu-  
diciorum ignorationem reformida-  
bunt? Quātò verò magis ad eam cau-  
sam instruendam sibi proficiscendū  
esse putabūt, in qua de ea tantūm par-  
te bonorum agetur, quæ edictū præ-  
sidiale nō excedet, quòd de præsidia-  
lium iudicum iniquitate appellatio-  
nis vtilissimo remedio sublato con-  
queri non poterunt? Sed & villarum  
suarum direptiones, amicorum, affi-  
nium, aut parētum oppressiones quī  
ferre poterunt? an non deserto hoc vr-  
banæ militiæ genere, pleno potissi-  
mum sollicitudinis ac stomachi, cō-  
festim ad ea maleficia vindicanda  
proficisci properabunt? Dicam pro-  
fectò, iudices, id quod mihi ipsi nu-  
per

per accidit. Cum Petri Puluæi patris mei maiores superioribus seculis Anglicis annis vel occubuiſſent, vel ita deiecti debilitatique eſſent, vt vixdū ipſe emergere afflictaſque & bellorum calamitatibus proſtratam gentilitatem excitare erigeréque potuiſſet, ecce hoc etiam ei ſumma in ſenectute fatale fuit, vt in Foſſario ſuo à nocturnis effraCTORIBUS & graſſatoribus multa ſupellectile ſpoliatus, maléque ac duriter acceptus, in veſtias arcas omni cum familia prope modum exanimatus concluderetur. Quas iniurias etſi omnium ordinū totius prouinciæ homines, vlcifci conarentur, mihi tamen & amici ſuauiſſimi, id eſt, Muſæ, quas vita mea chariores habeo, relinquendę, & forenſis indiſtriæ cura deferenda fuit, vt me illis vrbe quoque tandem relictâ cōiungerem. Quam in profectione & ne-

*Itinerum  
pericula.*

gotio

gotio etsi frequens vndique & amicorum & clientum multitudo salutandi conseruandique mei gratia cōsequeretur, tacitas tamen & occultas conscleratorum insidias, antequam eorum alios in furcas, alios in rotas figendos curassem, vix ego vitassem, nisi interdum per deuia loca, interdū etiam noctu quò vellē perrexissem. Sed faciāt eam aduocatorum esse fidem & integritatem (quæ sanè optimo cuique in omni genere causarum satis perspecta est) vt neque spe, neq; metu corrumpi aut inflecti possint, è contrario iudices ipsi quas in causarum patronos, si fortè eorum dubia, suspecta, vel etiam mala fuerit causa, sententias ferent: quorum non dico iudicia, de quibus modò locuti sumus, sed dicendi vim & acumen in eorum iuris ignoratione publico in concilio detegenda, grauitatē & constan

stantiam in eorum sententiis discutiendis & confutandis exhorrescunt? qui si ad gratiam, largitionem, potentiam sententias suas deflectunt, quāto magis ab iis gratiam inire volent, à quibus intelligunt eas ad iuris Civilis & equitatis rationem exquiri solere? Quamobrem si cūm C. Verres Siciliae prætor statuisset, vt arator Decumano, quò vellet Decumanus, vadimoniū promitteret, iure à M. Tullio reprehensus accusatúsque est, quòd non solūm contra legem Hieronicā, nec solūm contra consuetudinem superiorum prætorum fecisset, sed etiā contra omnia iura Siculorū, quæ habebant à Senatu populoque Romano, ne extra suum forum vadimoniū promittere cogerentur, ne vtiq; arationis intermissio fieret: quo odio ac supplicio digni iudicandi sunt, qui contra iura quæ à maioribus habemus,

*C. Verres  
Siciliae præ-  
toris statu-  
tum.*

*Siculi ex-  
tra suū fo-  
rum vadi-  
moniū pro-  
mittere nō  
coguntur.*

mus, id statuunt, vt extra forum hoc, magno sæpè numero vitæ cum discrimine, litigandum nobis sit, eoque tandem modo aduocationis munus deferatur? Neque verò hac publici commodi æquitatisque simulatione ac prætextu contenti sunt huius tam præclaræ cõstitutionis authores, sed etiã ij eius fundamentis positis optimum sanctissimũque ordinem patronorum notarunt, vt omnem ei famam & existimationem cum commodis eriperent, vt nihil grauius atque crudelius reseruarent quod in eum constituerent. Nam quid homini potest turpius, quid verò miscrius aut acerbius vñ venire? pecuniam si cui fortuna ademit, aut si alicuius eripuit iniuria, tamen dum existimatio est integra, facilè consolatur honestas egestatem. Hoc qui secum cogitant prudentes optimique yiri hominum  
existi

*Honestas  
 egestatũ cõ  
 solatio.*



existimationis ac communis humanitatis causa, id dedecus raro accidere volunt, sed timidè ac pedetentim isthuc descendunt, vi ac necessitate coacti, inuiti, multis cautionibus ac medicinis prius adhibitis. Considerant enim tum quid & quantum sit alterius famam & existimationem lædere, tum etiam quā legem sibi ipsis indicunt innocentia, cōtinentia, virtutumque omnium qui ab aliis vitæ rationem repossunt, hocque sibi cōmuni vtilitate cōmoti sumunt, vt corrigant mores aliorum, ac peccata reprehendant. Itaque si hi nostri Nomothetæ, officij, sanctimonia, diligentia atque existimationis rationē ducendam existimassent, non statim ad infamiae notas concurrissent, sed hæc secum locuti essent, Honestus est ordo, & de Rep. bene meritus, quid agimus? Si mehercule hæc secū duo ver-

ba fecissent, quid agimus, respirasset cupiditas atque inuidia paululum, aliquid loci rationi & consilio datum esset, seipso collegissent, Senatui fraudem atque abusum, si quæ deprehendissent, enuntiaissent, delinquentem coercendum curassent, neque eò ventum esset, ut eloquentissimus ac probatissimus ordo aliqua infamiae labe aspergeretur. Dici enim vix potest, quàm multa sint quæ antè fieri oporteat, quàm ad hanc rationem extremam & iniquissimam deueniatur. notare enim ordinē ne iure quidem quisquam bonus vult. Mauult enim commemorare se, cùm possit ignominia afficere, pepercisse, quàm cū parcere potuerit, notasse. Et si res ista grauissima sua sponte visa esset, tamen eius atrocitas studiorum utilitatisque publicae nomine leuanda erat. Quanto igitur magis eorū dignitati & honori

nori consulendum parcendúmque erat, quorum prudentiam omnes homines in cauendo nō in decipiendo perspexerunt (qui quæ proficiſcuntur à legibus & à iure Ciuili, nunquam à facilitate æquitatécque ſeiunxerunt? qui non verbis cōtrouerſias, ſed æquitate tuentur, iuráque nō literis ſed utilitate cōmuni exprimunt? qui tot annos ingenium, laborem, fidem ſuam cōſulentibus prōptam expoſitámque præbuerunt? qui ita iuſti & boni viri ſunt, vt natura nō diſciplina, nec magis iuris quàm iuſtitia cōſulti eſſe videntur, ita periti ac prudētes, vt ex iure Ciuili non ſciētia ſolūm quædam, verumetiam bonitas nata videatur? Quas virtutes & induſtriam cū hi noſtri correctores ſcienter prætermittant, quis non calumniandi nocendique animo eos adductos eſſe credat? Etenim eſt iniquiſſima in omni

*Iniquiſſima  
ma malorū*

*enumeratio prætermis-  
sis bonis*

re accusanda prætermis-  
lorum enumeratio vitiorumque sele-  
ctio. Nam isto quidem modo vel im-  
peria vituperabilia sunt, si imperato-  
rum peccata collegeris. At privilegio  
fraus facta est. qui sciunt? id enim eos  
planum facere, fraudisque causas ex-  
plicare ac detegere oportet. Quid er-  
go afferunt, quare id factum putetis?  
verè nihil possunt dicere, fingant ali-  
quid saltem cōmodè, ut ne planè vi-  
deantur facere, quod apertè faciunt,  
nostris privilegiis vestraeque auctori-  
tati illudere. fraus facta est. Quæ? ne-  
sciunt. Cui? nihilo magis. Quid est a-  
liud, iudicio ac legibus ac maiestate  
sacratioris concilij abuti ad quæstum  
atque ad libidinem, nisi hoc modo id  
cōminisci & obiicere, quod planum  
facere non modò nō possunt, verum  
ne conētur quidem? Quid est minus  
non dico accusatoris, sed hominis,  
quàm

quàm id obiicere, quod si verbo negatum fuerit, longius progredi non possit qui obiecerit? Quòd si aut causa fraudis, iudices, aut facti suspicio, aut quælibet vel minimæ res reperietur, quamobrem illi non nihil tamen in sugillando nostro ordine secuti, postremò si præter eam prædæ lucrique spem, quam dixi, quicquã aliud causæ inueneritis, nõ recusamus quin pro illorũ libidine de nobis nostrisq; privilegiis statuatur: sin aliud agitur nihil, nisi vt de Senatus authoritate detrahatur, si hoc solũ hoc tempore pugnatur, vt ad illam optimã præclarãque prædam, qua cõtenti esse debebant, hæc nostri ordinis macula velut cumulus accedat, quid aliud faciendum putatis, nisi vel vt Locrensium morẽ reuocetis (id quod Resp. à vobis quasi quotidiano conuicio efflagitat) eosque, qui hanc reliquasq;

*Locrensiũ  
mos reuocã  
d:u.*

eiusmodi vberrimas & quæstuosissimas deinceps ferri leges cupient, si eas Reip. vtilis esse non persuaferint, tanquam publicæ tranquillitatis hostes seuerissimè coerceatis, vel si faciliores haberi vultis, quid leuius in eos statuere potestis, quàm vt manifestæ calumniæ eos condemnnetis? Verùm concedamus illis vt ea prætereant, quæ cùm tacent, nulla esse concedunt. Illud quæramus, à quo fraus facta est? à proclamatore quodam fortè & rabula forensi audio, nunc dicunt aliquid quod ad rem pertinet, nisi ista causa tota per summam fraudem & malitiam ab illis ficta est. Ergo in sanctissimum ordinem aduocatorum, qui nihil commiserunt, omnia tela coniecta sunt, quæ parata sunt in eos qui permulta malè agendi causa fraudandique fuerunt. Hoc igitur loco petunt à vobis, iudices, vt quemadmodum

*Qui tacet,  
consentire  
videtur.*

dum ignis in aquam coniectus continuo restinguitur ac refrigeratur, sic referuens falsum hoc crimen in purissimum castissimumque ordinem collatum vobis iudicibus statim cōcidat & extingatur, & ne qua invidia communis, ne aliena peccata, ne temporum vitia noceant, nec quæ in vitia, in mores erigi debent, ea in ornatisimum & innocentissimum ordinem emittantur, cū non suo crimine, sed quorundam vitio sint in quoddam odium iniustum vocati. Sed esto, versentur nōnulli ex his in quadam vel fraude, vel avaritia, vel perfidia, an propterea statim ordo ipse suis priuilegiis spoliandus erit? an omnia ei commoda & ornamenta eripienda erunt? Equidem si hac seueritate vsi essent maiores nostri, vt alicuius rei abusu comperto eam cōfestim peremissent, iandiu nobis mu-

*Propter  
abusum alius  
cuius rei omnino eadem res nō est abolenda.*

licribus fuisset carendum, iandiu vi-  
tes nullas haberemus, ac ne vix qui-  
dem magistratus ipsi sua insignia, le-  
ges suam vim & auctoritatem, epi-  
scopi suas infulas retinuissent. Quid  
enim tam sanctum, quo non tandem  
aliquando peruersè abutantur homi-  
nes? quid tam bene cōstitutum, quod  
non abusu deprauetur & corrumpat-  
ur? Quæ lex quæ neque inflecti gra-  
tia, neque perfringi potentia, neque  
adulterari pecunia possit? Et tamē vi-  
tes quotidie propagamus, mulieres  
amplectimur, magistratus creamus,  
leges tuemur, episcopos colimus, nec  
tam eius quod malè fit, quàm quod  
fieri debere intelligimus, rationē ha-  
bendam putamus, eam hominū esse  
conditionem reputantes, vt labi, fal-  
li, decipi, errare, quamuis id eos mi-  
nime deceat, possint. Quod vtinam  
nostris instigatoribus venisset in mē-  
tem,



tem, & ex nostrorum scriptis didicissent, ipsa collegia aut ordines delinquere non intelligi, nec notari debere, nisi omnium ex eo ordine aut maioris partis eorum coitione facta, & cōsilio habito quid commissum esse manifestum erit. Quare si qui priuatim ex eo ordine deliquerint, in eos solos animaduerti solet: quinimò si ab ipso collegio aut vniuerso ordine peccatum esse dicetur, non singulos eius collegij aut ordinis, sed eos tantum qui peccandi authores extitere, quique inter eos magis conspicui habentur, coerceri identidem comprobatum est, ut metus quidem ad omnes, poena verò ad paucos perueniat, vniuscusque improbi supplicio multorum improbitas coerceatur. Sed longè alia mens fuit & consilium horum nostrorum architectorum, ( ut videlicet in hoc artificio callidiores, eruditiores, pru-

*Quando collegia deliquisse intelligantur.*

*Leges arane-  
arum te-  
lis similes.*

dentiores, abundantiores cōsilio, ingenio, sapientia viderentur) in advocatorum delictis & fraudibus coercendis ac compescendis. Existimaerunt enim illi leges suas aranearū telis, ut à quodā dicebatur, similes esse debere, ut hi quorum authoritas nōdum satis confirmata videretur, priui legiis ornamentisque suis exuerētur, & in edicti laqueos inciderent: hi verò quorum iam confirmata esset existimatio & dignitas, ab ipsius legis pœna eximerentur. Itaque postremis edicti sui verbis duodecim (quod quàm absurdè, dici non potest) exceperunt qui primos gradus aduocationis tenebunt. Quos ego excipi & propter eorum dignitatem, & propter æquitatem, iudices, sæpe vehementer gaudeo. Sed hac exceptione non tã hi afficiuntur beneficio, quàm priuantur iniuria, nec tã honoris causa exi

*Excepti ab  
edicto.*

sa exi

sa eximuntur, quàm vt speciosa illa  
 exceptione tententur leuiter quo ani-  
 mo suorum priuilegiorum diminu-  
 tionem ferre possint, & vt quod ra-  
 tione non poterant, obtinerent eorū  
 dissimulatione & patientia, ex suo sci-  
 licet ingenio illos fingentes similes  
 fore Glauciæ illius hominis impuri,  
 sed tamen acuti, qui populum Ro-  
 manum monere solebat, vt cū lex  
 aliqua recitaretur, primum versum  
 attenderet, si esset dictator, consul,  
 prætor, magister equitum, ne labora-  
 ret, sciret nihil ad se pertinere: si au-  
 tem quicumque post hanc legem vi-  
 deret, ne qua noua quæstione alliga-  
 retur. At hi eorum vultus quos cerni-  
 tis, Patres, quamuis se ab huius legis  
 iniquitate exceptos liberósq; videāt,  
 quasi tacito quodam mentis sermo-  
 ne indicant iucundum suauémque  
 sibi priuilegiorum fructum esse non  
 posse,

*Glaucia  
homo im-  
purus.*

*Eiusdē con-  
siliū.*

*Confutatio  
exceptionis  
edicti.*

posse, si reliquos collegas suos eorum viderint expertes fieri, eosque auocari à iudiciis, à curia. Et quia non est astantibus omnibus necesse dicere, à me certè (qui tamen neque ætate, neque ingenio, neque authoritate sum cum eis comparandus) dici volunt.

*Amplificatio à dolore.*

Dolent, inquam, ac vehementer anguntur, iudices, cùm videant se in eadem causa, in qua nos, fuisse, nos non in eadem esse fortuna. Atq; vt è portu soluentibus ij qui iam in portum ex alto inuehūtur, præcipere summo studio solent & tempestatum rationem, & prædonum & locorum, quòd natura affert vt eis faueamus qui eadem pericula, quibus nos perfuncti sum⁹, ingrediūtur: ita illi prope iam ex magna iactatione terram videntes, ostēdunt se beneuolentissimo in nos esse animo, quibus vident maximas tempestates esse subeundas. Et vt optimis  
 ciui

ciuibus quoduis exilium patria suauius esse solet, afflicto atque euerso Reip. statu, sic illi se ibi cum dignitate esse debere non putant, vbi nos nō possemus. Prospiciunt enim hoc incommodum confirmatum multorū infirmare dignitatem, & si initio non erit refutatum impune tandem ad omnium perniciem conualescere. In quibus, si ex ipsorum domestico incommodo nullus dolor insideret: tamen esset illa cogitatio in alterius iniuria sese despectos, dignitatēque ordinis contemptam & abiectam, quod meherculè, iudices, illis nō mediocriter ferendum videtur. Habet enim quendam aculeum contumelia, quem pati prudentes ac viri boni difficilimè possunt. Itaque vt est eorū eximia virtus & integritas, abuti patientia sua non sinunt, imò contumelia legis commouentur, conspirant nobi

*Cōtumelia  
aculeus.*

nobiscum, communem libertatem communi studio atque amore defendunt, nec dubitant hanc defensionē cum communi defensione cōiungere illis obrectatoribus & delatoribus tanquam pro se quisque eorū occurrentes. Quorum omnium in hac causa solitudinem, curam, & attentionem licet ignorare minimē possitis, ut necesse non videatur iuris peritissimi Caroli Molinæi, Annæ Terrerij, Franc. Portani, aliorūque consultissimorum & disertissimorum patronorum studia & voluntates pro hac priuilegiorum libertate contra huius edicti iniquitatem defendēda singulatim commemorare: tamen à me in dicendo prætereūda non est Aegidij Bourdini procuratoris fisci, B. Dumenillis, R. Boucheraidi eiusdem fisci patronorum animi magnitudo, quā ad hanc causam afferunt, ne vetus cōsue

sue

*Hac priuilegiorum libertas contra huius edicti iniquitatem à plurimis defensa.*

fuetudo fori & pristinus mos iudiciorum tollatur, ne casum & orbitatem Senatus videant. Quibus omnibus iccirco præcipuam laudem gratiamque debemus, quòd ostenderint aliquid nobis in eorum fide, officio, & diligentia præsidij esse oportere. Sed ad edicti nostri æquitate redeo. Si hoc ad authoritatem & amplitudinem Senatus maximè pertinere visum est maioribus, ne certus & definitus aduocatorum numerus constitueretur qui consilij sui copiam in causis orandis, in respondendo, cauendo, ac scribendo facerent, quid est quãobrem eorum numerum definiemus, qui fori priuilegiis frui debebunt? Si omnibus his qui bonis literis quantulancunque operam nauant, idem priuilegium indultum est, ut initio dicebamus, quidnam causæ dicturi sunt, quominus idem omnibus causidicis

*Aduoca-  
torum nume-  
rus non est  
definiendus.*

concedatur? Si contra publicam vtilitatem id existimari debet, quâ eius iniquitatem in quibusdam admittendam, in aliis verò improbandam diiudicabunt? Si nihil reperitur in advocatorum ordine perfidiosum, & insidiosum, & fallax in munere obeundo, quid est, cur alios iniuria afficiet, alios ea liberabunt? Quemadmodum ij qui Reip. præfuturi sunt, totum corpus ipsius Reip. si Platonis consilium probamus, curare debent, ne dum parti consulunt, partem negligunt, rem perniciosissimam in ciuitatem inducant, seditionem atque discordiam: ita diligenter cauendum est, ne iisdem de causis alij plectantur, alij ne appellentur quidem. Et vt scalarum gradus si alios tollas, alios incidas, nonnullos malè hærentes relinquas, ruinæ periculum struas, non ascensum pares: sic eiusdem ordinis & collegij  
 si alios

*Totū Reip.  
 pub. corpus  
 curandum  
 est.*



fi alios nulla iusta de causa & occasione beneficio afficias, alios ornamentis spolies, nonnullos loco moueas, iter ad virtutē intercipias, non ascensum ad eam pares. Verūm ad suæ exceptionis confirmationem vel Leoninæ constitutionis autoritate vten-  
*Leonina  
constitutio*  
 tur, qua ab eo constitutum est, vt exemplissima aduocatione Prætoriana, quæ centum quinquaginta togatis concludebatur, sexagintaquatuor iisdem imperialibus beneficiis perfruerentur, quibus fisci patroni liberique eorum honorati sunt: vel, quod probabilius est, eo nitetur, quod Leo iunior & Zeno constituerunt, vt ad similitudinem aduocatorum Prætorianæ præfecturæ quindecim ex vrbi-  
 cario foro, qui primos gradus obtinerent, iisdem priuilegiis gauderēt. Sed si docuero, hoc dissimillima ratione

*Comparatio rationis  
vtriusque  
partis.*

fieri, magnúmque interuallum esse interiectum inter horum imperatorum consilia & inter istorum demen-  
tiam, quò confugient, nisi vt vel sui quæstus causa omnes has iniquitates constituisse, vel ignorationem suam confiteantur & agnoscant? nunquid causabuntur quin ab hoc iudicio ab-  
eant turpissimè victi? Illi maioribus propositis præmiis ad dicendi, virtu-  
tisque studium inuitant, hi verò pu-  
niendam eam censent, illi beneficiis eos cumulant, qui diu aduocationis munus obierint, hi verò iter ad id diu præstandum suis rationibus & edi-  
ctis intercipiunt: éstque illorum con-  
siliu tantò præclarius & laudabilius existimādum, quantò proniores esse debemus ad bene merendum, quàm ad iniuriam inferēdam. Quare si eos imperatores sibi ad imitandum pro-  
posue

posuerunt, in viam vnde diuerterunt  
 redeāt, & non duodecim tantum in-  
 iuria liberent, sed quingentos longè  
 maioribus beneficiis ornandos curēt,  
 reliquaque dignitatis ornamenta, quę  
 Anastasij, Iustini, aliorumque impe-  
 ratorum cōstitutionibus fisci patro-  
 nis concessa sunt, iis addant, & ad hu-  
 ius priuilegij commoditates, quę in  
 possessoriiis, mistis, & personalibus a-  
 ctionibus (non tamen infra decē Tu-  
 ronenses libras) consistunt, rei perse-  
 cutorias quoque adiiciant, eamque  
 decem Turonensium librarum exce-  
 ptam summam ne detrahant, item vt  
 eis iniuriam siue publicam siue priua-  
 tam apud eosdem Requestarum Pa-  
 latij iudices persequi vlciscique li-  
 ceat. Cæterum pace constituta de eo  
 verba faciant, si velint, apud eos qui  
 clauum Reip. tenent, malè se rem ha-

*Summa exce-  
 pta decem  
 Turonen-  
 sium libra-  
 rum.*

*Quod vir-  
tute effici  
debet nõ est  
tentandum  
pecunia.*

bere, cùm quod virtute effici debet id  
tētatur pecunia, cùm insignia virtu-  
tis honorũque vocabula multi sine  
virtute cōsequuntur, id est, cùm non  
homini sed liberis, non moribus sed  
maioribus, non virtuti perspectæ, sed  
ambitioni, largitioni, sordibus hono-  
res deferuntur, cùm Senatorij nomi-  
nis fiunt nundinationes, cùm de gre-  
ge novitiorum creantur magistratus,  
cùm obrepunt ad honores commen-  
datione fumosarum imaginũ ij, quo-  
rum nunquã audita vox in foro, nun-  
quam periculum factum cōsiliij. Ad-  
dant etiam favore reorum, si audēt,  
petitiones bonorum denuò grauioribus  
propositis pœnis interdiciēdas,  
nec dissimulatione prætereant multa  
propter iniuriã temporum, & neces-  
sitate cogente introducta ac recepta,  
quæ in pristinum statum reponi tolli-  
que

que debent. Postremò de collapsa veterē ecclesiastica disciplina reuocanda apud ecclesiæ antistites piè, graui-  
ter, constantérque agant. Sed & ipsos huius edicti inuentores monitos velim, magnum esse in Rep. campum, vt sapienter dicere solebat Crassus, *Elegans Crassi dictum.* multis apertum cursum ad laudem, multóq; præclarius & honestius esse sua virtute in altiore locum ascendere, quàm per alterius incommodũ & calamitatem in eũ peruenire velle, aliósque accusare, ex quibus crescere possis. Id si vel præstiterint, vel certè conati fuerint, eorúmque opera & studio perfectum erit, vt prædictæ à nobis priuilegiorum accessiones, quam sexagintaquatuor tantummodò ex hac infinita multitudine aduocatorum concedantur, tum eorũ voluntatem & diligentiam in imperia-

libus beneficiis incitandis vniuersus hic noster ordo laudibus prosequetur, tum eis se plurimum debere existimabit. Sed vt cætera se rectè habere ponamus, eoque iam ventum esse (id quod tamen scio vos pro vestra sapientia nunquam permissuros) vt tantummodò de quibusdam excipiēdis, seu verius iniuria priuandis, agendū sit, quid iniquius quàm duodecim solummodò excipere ex sexcentis aduocatis, quorum qui vel ducentissimum locum tenent, tãta fide, officio, diligentia in eo munere se fortasse gerunt, quanta qui primos illos gradus tenebunt? Eorum igitur sententiæ magis consentaneum esset, vt ex huius amplissimi fori non centum quinquaginta (quem numerum esse diximus aduocatorum Prætorianæ præfecturæ) sed octingētis & eò amplius aduo

*Numerus  
aduocato-  
rum Præto-  
rianæ præ-  
fecturæ.*

aduocatis , non modò duodecim,  
quod ridiculum est , aut sexaginta-  
quatuor, quod in tanta multitudine  
iniquum sed quadringenti aut quin-  
genti exciperentur. Sanè cùm multa  
sint in hoc eorum commēto indigna  
& reprehendēda, tum nihil certè de-  
ridendum magis, minúsque ferendū,  
quàm quòd tali exceptione se tene-  
bras vobis offudisse, fucúmque fecis-  
se arbitrantur, per quorum sententias  
& iusiurandum id assequantur, quod  
ipsi criminationibus & calumniis as-  
sequi posse desperarunt. Verùm hoc  
quod est aut ita peruersum, aut ridi-  
culum, aut ita malitiosum, aut ita in-  
tegrumētis inuolutum , vt obscurum  
sit, nec cernatur, relinquamus, nec tā  
copiam quæ in causa tali oblata ne-  
mini deesse potest, quàm modū ali-  
quem in dicendo , exitúmque, quod

difficilius est, quàm principium inuenire, quæramus. Satis enim hac de re mihi multa verba fecisse videor, ac vereor ne hæc ipsa nimium multa esse videantur, præsertim apud vos homines peritissimos. Dicta sit igitur à me causa & perorata. Etenim ea quæ sit iam videtis, quantum iudicium sustineatis, intelligitis, quanta res sit commissa vobis, perspicitis: nunc quid agendum sit considerate, proque vestri ordinis dignitate atque gloria, quæ vobis à maioribus cum magna in rebus omnibus, tum summa in edictorum regionum comprobatione tradita est, videte quem vobis animum suscipiendum putetis. Nam cum multa diuinitus P. C. à principibus nostris inuenta atque instituta sunt, tum nihil præclarius, quàm ut quemadmodum Ephori in Spartanorum reges, ita



ita vos in id inquiratis, quod à Principe de communibus rebus decernendum est, vt contra periculosissimas hominum potentias conditioni omnium ciuium prouideatis, & vt si fortè ei obreptum erit, à vobis admonitus & persuasus, vel ab incepto reuocetur, vel expeditiorem ac ciuibus suis vtiliorem aliam ineat rationem. Omitto quòd non in regni proceres modò, sed in se quoque ius à vobis dici patiatur, ne quid in sua causa committat, quod ab æquitatis rationisq; norma seiunctum sit aut abhorrens. Quid est igitur quod cuiusquam animi in hac causa dubiũ facere possit, quominus hoc inimicum atque infestum edictum contra Reip. vtilitatem intrepidè iudicandum esse pronuntietis? cum præsertim Rex ipse omnis iuris & iustitiæ obseruatissimus

eius probandi vel improbandi potestatem vobis quasi habenas tradat? vósque non solum vt quieto, sed etiã vt bono animo magnóque sitis hortetur, nihil sine cõsilio Senatus & authoritate, nihil nisi eo approbante cõstituat? Quòd si vnquam de bonis & fortibus viris, si vnquam de bene meritis ciuibus potestas vobis iudicandi fuit, hoc profectò tempore eã potestatem omnem vos habetis, vt statuatis, vtrùm nos qui semper vestræ authoritati dediti fuimus, omnibus ornamentis spoliemur, an diu vexati ab inimicis aliquando per vos ac vestram fidem sapientiãque recreemur. Sic enim vobis P. C. dies illuxit, hæc potestas data est, vt si vnquã studia vestra erga nos, quantúmque virtutis, constantiæ, grauitatis, ac fidei in huius vestri ordinis consilio & authoritate

thoritate sperare deberemus, vultu & verbis significastis, nunc re & sententiis nobis omnibus declarare possitis. Quo ergo animo vos esse debetis in eorum potissimum causa, quorum omne curriculum industriæ in foro, in curia, in amicorum causis agendis elaboratum est? quorum humeris hoc iudiciorum onus magna ex parte sustinetur? quos D. Marcus si eius imperium ad hanc ætatem peruenisset legibus suis consecrandis adhibuisset? Quanto, inquam, studio vos convenit hoc privilegium vnà cum ordinis vestri dignitate defendere ac confirmare, eosque ab inimici edicti iniuria liberare, & in ciuitate retinere, quos si hoc privilegio spoliari permiseritis, mihi credite iudices, serpet hoc incommodum longius quàm putatis: nec enim solummodò corona

*Initjs ob  
uiandum.*

con

confessus vester cinctus nō erit vt so-  
let, nec vsitata frequentia stīpati nō  
eritis, sed etiā magnis laboribus fun-  
datam curiam, magnāque virtute sta-  
bilitam dignitatem amplitudinē-  
que vestram vnum hoc confirmatū  
edictum planē tandem delebit, vna  
hæc eripiet hora. Id autem ne vnquā  
posthac non modò non cōtingat, sed  
ne cogitari quidem possit à quoquā,  
vos hodierno die prouidere potestis,  
vt nec solūm ad tempus incredibilē  
Reip. vtilitatem peperisse videami-  
ni, sed etiam ad exemplum. Quo qui-  
dem eo casu & orbitate senatus si ani-  
mis non commouemini, at certē vos  
mouere debent hæ voces multorum  
quas audio, & quibus intersum quoti-  
die, Valeat, inquiunt, valeat hic Sena-  
tus, sit florens, stet hic amplissimus or-  
do, nobisq; charissimus, quoquo mo-  
do

do meritis de nobiscrit, quoniam in  
 eo amplius nobis versari nō licet (ve-  
 tus est enim, Vbi nō sis qui fueris, nō  
 esse cur velis viuere) nos vel in Tu-  
 sculanum, vel in Cumanum, id est, in  
 sedes nostras patrias reuertemur, &  
 ad eas nos referem<sup>9</sup> artes, (Quis enim  
 hoc non dederit nobis, cū his tem-  
 poribus habeamus aliud nihil in quo  
 acquiescamus, quōd casu nescio quo  
 in ea tempora nostra ætas inciderit,  
 vt cū maximè florere nos oportet,  
 tum commētatio causarum abii-  
 cienda, omnesque fructus industriæ  
 forensis perdendi sint?) quibus à pri-  
 mis temporibus ætatis studium no-  
 strum dedimus, id est, omnem curam  
 atque operam ad philosophiam con-  
 feremus, fructūsque doctrinæ perci-  
 piemus eos qui maximi sunt, vt ea  
 consyderemus atque tractemus, quo-  
 rum

*Vbi non sis  
 qui fueris,  
 non esse cur  
 velis viue-  
 re.*

*Epilogus.*

rum vsum & delectationem multi docti homines, fortasse non rectè, sed tamen multi omnibus publicis & aetis & voluptatibus anteponendam putauerunt: quæ etiam si minus proderunt, animum tamen à solitudine abducent, & contra omnes fortunæ impetus armabunt. Conseruate igitur, iudices, eos qui qua sanctissimi homines pietate erga Deum Opt. Max. esse solent, eadem erga vos semper fuere, quibusque numen vestrum graue & sanctum in omni vita fuit. quos si vobis, si Reipublicæ, cōseruatis, addictos, deditos, obstrictos vobis ac liberis vestris habebitis, omniumque eorum neruorum ac laborum vos potissimum, iudices, fructus vberes diuturnosque capietis. Sexcenti non vfu quidem forensi atque exercitatione tirones causarum patroni, & qui ad  
sunt

sunt, & qui vbicunque sunt, tam humanitati vestræ, quàm suæ causæ fidentes, vestram seueritatem desyderant, vestrum auxilium requirunt, omnia sua iura, commoda, auxilia, totam deniq; libertatem in vestris sententiis versari arbitrantur, vos orant atque obsecrant, vt multis iniuriis iactata atque agitata æquitas in hoc tandem loco consistere & cōfirmari possit. Vos, inquam, qui huic publico cōcilio præestis, quosque & debere & posse intelligunt opitulari, obtestantur, ne quos antea benignè fouistis & ornastis, eos nunc velut in perpetuum calamitosumque exilium abire permittatis, ne suis ornamentis spoliati atque nudati, non modò obiiciantur inuidiæ, sed etiam fictæ dedantur suspitioni, ne in eorum exilio & calamitate lætentur inimici, & tanquam

victo

victores ex inimicorum dolore iustissimum hunc agant triumphum, ne eos deteriore conditione esse sinatis, quàm sunt liberalium artium doctores, quique his operam dant, quàm sunt milites, quàm sunt aulici corumque; serui, quàm sunt plerique alij, qui ea quæ homine ingenuo liberaliterque educato digna sunt, ne primoribus quidem labris vnquam attigerunt. En etiam viri primarij huiusque professionis antistites, qui pari studio vestram fidem implorant ac petunt, ne iter ad virtutem hodierno die vobis iudicibus intercipiatur, ne honestissimis studiis deditos vobisque addictos contemnere videamini, ne hanc iuris & iustitiæ omniumque magnarum rerum & artium cognitione cumulatam scholam vacuum ab his fieri patiamini, quorum summam  
fidem,



fidem, officium, diligentiam in omni genere causarum perspectam habetis, sed quem florentissimum Senatū à maioribus accepistis, pro dignitate & autoritate vestra conseruetis. Denique ut aut hoc vniuerso ordini collegiōque aduocatorū priuilegium conseruetis integrum, nosque omnes eo dignos esse censeatis, aut si ita vobis decretum est, ut ea, quæ à vobis magnoperè prouidenda sunt, negligatis, hoc idem eis eripi patiamini, & quæ beneficia in eos cōtulistis, aut in nostra salute augeatis, aut in nostro exitio occasura esse iubeatis. Nō enim fas esse ducunt versari in hoc curriculo & theatro, nobis æmulis atque imitatoribus studiorum ac laborum suorum quasi quibusdam sociis, comitibus, gloriosique laboris confortibus à se distractis & amissis.

Quid vos iudices? quò tandem animo eritis? aut omnes confirmato privilegio in ciuitate vobis retinendi sunt, aut omnes, eo sublato, exterminandi, quòdvis exilium, quævis calamitas his optatior est, quàm hæc ciuitas, quàm hoc theatrum vno aliquo ex ordine quasi exulante, si piè, si cum dolore faciunt, moueant vos horum preces, moueat vos pietas.

FINIS.



I O A N N E S B R E -  
 chæus Turonus Adriano  
 Puluæo suo  
 S. P. D.



*Q*uam de Aduoca-  
 torum commodis  
 & rationibus, de-  
 que amplissima il-  
 lius Curie Pari-  
 siensis dignitate, o-  
 rationem scripsisti, perlegi sanè, mi  
 Puluæ: perlegi, inquam, cum li-  
 benter, tum verò magna cum vo-  
 luptate. Cæterum, quòd iudicium de  
 ea re meū postulas, nec ingenio qui-  
 dem meo, quod sentio quàm sit exi-